

筠

軒

文

鈔

筠軒文鈔卷五

臨海洪頤煊

曾氏一貫論

論語一貫之旨兩見於經宋儒謂一貫爲孔門不傳之秘惟曾氏得其真詮端木氏次之其餘不可得聞此其說非也案爾雅釋詁云貫事也又云貫習也古人解貫字皆屬行說卽孔子所謂道也會氏以忠恕解一貫忠卽是一恕卽是貫恕非忠不立忠非恕不行此卽一貫之義非忠恕之外別有一貫之用也孔子因能行者少故偶呼曾氏以發之他如告哀公曰凡爲天下國家有

九經所以行之者一也一者忠也告仲弓曰已所不欲勿施於人勿施者恕也忠恕之說盡人皆得聞之寧獨二氏爲得其傳乎又老子云天得一以清地得一以寧王侯得一以爲天下貞又云聖人抱一以爲天下式莊子云自其同者觀之萬物皆一也老莊異端尙知一之爲貫曾是七十子身通六藝者而反不知一貫之爲用乎故呂氏春秋云亡國之主一貫說文引董子云一貫三爲王莊子德充符云以不可爲一貫是一貫亦當時常語非果有不傳之秘也端木氏因論學孔子語以一貫此又別是一義後人以錢十百爲一貫穀梁傳云

羈貫成童范甯注羈貫謂交午翦髮以爲飾鄭君注儀
禮云一從一橫曰午是貫從十起義故說文引孔子曰
推一合十爲士論語子貢曰回也聞一以知十賜也聞
一以知二孔門惟顏氏生知亞于聖人故能以一貫十
曾氏力行忠恕已至故聞而卽唯若端木氏力行忠恕
有未至則猶有然與非之疑夫子云子一以貫之夫亦
謂道在忠恕非與語曾氏者有二也宋儒好言玄妙幾
若孔門一貫別有一物得其傳卽可超凡入聖孔子秘
不示人者此禪家頓悟法容或有之以此而語聖人之
道恐失之遠矣

孔子壁中書考

孔子壁中書據漢書魯恭王餘傅恭王初好治宮室壞孔子舊宅以廣其宮於其壁中得古文經傳未嘗著其目也藝文志武帝末魯共王壞孔子宅欲以廣其宮而得古文尚書及禮記論語孝經凡數十篇皆古字劉歆傳又云魯恭王壞孔子宅欲以爲宮而得古文於壞壁中逸禮有三十九書十六篇及春秋左氏丘明所修皆古文舊書多者二十餘通臧於祕府歆所言視藝文志多左氏春秋而無論語孝經王充論衡佚文篇孝武皇帝封弟爲魯恭王恭王壞孔子宅以爲宮得佚尚書百

篇禮三百春秋三十篇論語二十一篇亦無孝經而有春秋說文解字序魯恭王壞孔子宅而得禮記尚書春秋論語孝經而晉書衛恒傳漢武時魯恭王壞孔子宅得尚書春秋論語孝經時人不復知有古文謂之科斗書漢世秘藏希得見之北史江式傳魯恭王壞孔子宅而得尚書春秋論語孝經水經泗水注魯恭王壞孔子舊宅得尚書春秋論語孝經其言又皆有春秋而無禮記頤煊案漢書藝文志春秋古經十二篇又云左氏傳三十卷注云左丘明魯太史皆不云出于孔壁儒林傳漢興北平侯張蒼及梁太傅賈誼京兆尹張敞太中大

夫劉公子皆修春秋左氏傳考魯恭王餘以孝景前三年徙王魯張蒼卽以孝景五年薨左氏春秋在孔壁未出以前已盛傳于世祕府已有藏本後孔壁所得與祕府本無異故班氏作志卽據祕府本錄之而不復載及孔壁中書藝文志禮古經者出於魯淹中及孔氏學七十篇文相似多三十九及明堂陰陽王史氏記所見多天子諸侯卿大夫之制雖不能備猶瘡倉等推士禮而致於天子之說所云孔氏學者卽孔壁中書與魯淹中所得別一本鄭君六藝論亦云後得孔氏壁中河間獻王古文禮五十六篇記百三十一篇周禮六篇其十七

篇與高堂生所傳同而字多異班氏因文有異同錄存
其本故定孔壁所得書爲尙書禮記論語孝經凡四種
厥後諸儒傳述因春秋禮記皆先孔壁而出故所記或
存或畧其實孔壁所得凡五書尙書禮記春秋論語孝
經當以許君之言爲定嘉慶壬戌十月八日

周九鼎入秦考

史記周本紀云西周君奔秦秦取九鼎寶器而遷西周公於蕞狐秦本紀云昭襄王五十二年周民東亡其器九鼎入秦封禪書云秦滅周周之九鼎入於秦或曰宋太丘社亡而鼎没于泗水彭城下考六國表宋太丘社亡在周顯王三十三年當秦惠文王二年下距秦滅周八十二年若九鼎早没于泗水何以後復入秦始皇本紀云二十八年始皇還過彭城齊戒禱祀欲出周鼎泗水使千人没水求之弗得其時上距滅周止三十七年若九鼎在秦何以復求于泗水且漢初去秦未遠封禪

書孝文時新垣平言曰周鼎亡在泗水中今河溢通泗臣望東北汾陰直有金寶氣意周鼎其出乎孝武時有司皆曰禹收九牧之金鑄九鼎皆嘗烹鷓上帝鬼神遭聖則興遷于夏商周德衰宋之社亡鼎乃淪沒竝不言九鼎入秦之事若謂九鼎沒泗卽在入秦之年以道里計之自周入秦當由河達渭必不取道彭城學者皆以爲疑頤煊案國策顏率曰昔武王伐殷而取九鼎一鼎九萬人挽之九鼎八十一萬人挽之孔冲遠春秋正義云挽鼎人數或是虛言要知其鼎有九故稱九鼎封禪書稱鼎可烹鷓上帝疑九鼎亦非至重難移之物故夏

傳之商商傳之周流轉於河洛之間是時西周孱弱僅如泗上小侯秦韓齊楚爭欲得鼎見于國策者五九鼎或有入于諸侯之國惟不知其何以在宋太丘社沒入泗水史冊散佚無可考證迨後昭襄王五十二年西周既滅鼎入於秦未必其九者俱在至始皇二十八年過彭城聞宋太丘社亡鼎沒之說因復求鼎于泗水其時昭襄王取以入秦之鼎固無恙也秦旋覆亡項羽入關燒秦宮室火三月不滅九鼎存者疑亦在灰燼之中故自高祖定天下以後絕無言及咸陽九鼎者至孝文十七年新垣平用事唯知泗水尙有周鼎於是羣相稱煽

不知其時昭襄王所取入秦之九鼎其亡固已久矣王
充論衡儒增篇言或周亡之時將軍擣人衆見鼎盜取
姦人鑄爍以爲他器始皇求不得後因言有神名則空
生沒於泗水之語其言亦近理至若張守節史記正義
謂周赧王十九年秦昭王取九鼎一飛入泗水餘八入
於秦中豈理之可信也哉

擬州縣請立靈星祠議

謹案靈星之祀見於毛詩序絲衣繹賓尸也高子曰靈星之尸也史記封禪書云或曰周興而邑官立后稷之祠至今血食天下於是高祖制詔御史其令郡國立靈星祠元封三年其令天下尊祠靈星三輔故事長安城東有靈星祠是也續漢志云言祠后稷而謂之靈星者以后稷又配食星也孔冲遠毛詩正義云靈星者不知何星續漢志云舊說謂天田星也一曰龍左角爲天田官主穀風俗通云左中郎將賈逵說龍第三有天田星靈者神也故祀以報功辰之神爲靈星故以壬辰日祠

靈星于東南金勝爲土相也漢書音義張晏曰龍星左角曰天田則農祥也晨見而祭之春秋左氏傳龍見而雩杜元凱注云建巳之月蒼龍宿之體昏見東方萬物始盛待雨而大故祭天遠爲百穀求膏雨王充論衡云靈星之祭祭水旱也於禮舊名曰雩祭邕獨斷靈星一曰龍星周書作雩謂之農星後漢書高句驪傳謂之雩星皆聲相近龍星昏見在夏正四月晨見則在十月左氏傳云龍見而畢務是也周禮大司寇孟冬祀司民獻民數于王鄭君注司民星名謂軒轅角也賈公彥釋云軒轅有十七星如龍形有兩角角有大民小民左角卽

天田星也古者重民事故龍星晨見昏見皆祭之漢舊儀云古者歲再祠靈星靈星春秋之太牢禮也風俗通俗說縣令問主簿靈星在城東南何法主簿仰荅曰唯靈星所以在東南亦不知也杜氏通典爲之釋曰東南祭之就歲星之位也歲星爲星之始最尊故就其位續漢志云祀用壬辰日祠之壬爲水辰爲龍就其類也牲用太牢縣邑令長侍祠舞者用童男十六人舞者象教田初爲芟除次耕種芸耨驅爵及獲刈春簸之形象其功也古今注云元和三年初爲郡國立稷及祠社靈星禮器隋書禮儀志云晉元帝建武元年令郡國縣兼祀

靈星開皇初於國城東南七里延興門外爲靈星壇立
秋後辰合有司祠以一少牢杜氏通典天寶四載勅昇
靈星爲中祀是歷代靈星之祀未嘗廢也今請依禮經
合州縣於城東南立靈星祠每歲四月辰日州縣官用
少牢致祭靈星爲百姓求雨用舞十月辰日再祭以報
歲功謹議

書史記後

衛宏漢儀注太史公武帝置位在丞相上天下計書先
上太史公副上丞相序事如古春秋司馬遷死後宣帝
以其官爲令行文書而已案史記封禪書云天子郊雍
有司與太史公祠官寬舒議漢書郊祀志作有司與太
史令談百官公卿表有太史令而無太史公當由宣帝
後追改非武帝時所置之官名也太史公本周官周禮
有太史小史馮相氏保章氏內史外史諸職皆掌天文
圖籍至春秋時天子有內史諸侯有太史故左氏傳韓
宣子聘魯觀書於太史氏見易象與魯春秋曰周禮盡

在魯矣太史凡邦國都鄙及萬民之有約劑者藏焉以貳六官故天下計書先上太史公虞喜志林云古者主天官者皆上公至漢其職轉卑然朝會坐位猶居公上尊天之道也太史公自序著十二本紀十表八書七十列傳凡百三十篇五十二萬六千五百字爲太史公書序畧以拾遺補藝成一家言據此則書名太史公遷所自署桓譚云遷所著書成以示東方朔朔皆署曰太史公或曰遷外孫楊惲所稱其說非也漢書藝文志太史公百三十篇馮商所續太史公七篇東平思王傳上書求諸子及太史公書後漢書竇融傳賜融太史公五宗

外戚世家魏其侯列傳楊終傳受詔刪太史公書王充
論衡葛洪抱朴子引作太史公記皆其舊題如此至隋
書經籍志始云史記一百三十卷目錄一卷漢中書令
司馬遷撰當由六朝本改題迄今遂相承而不變矣

書漢書地理志後

漢書地理志近日有錢氏站新輯本頤煊嘗采輯羣書是正其誤其未經錢氏改正并與錢氏違者京兆尹南陵下師古曰茲水秦穆公更名以章霸功視子孫錢氏塗去師字改作班注原文案高帝紀引此注作應劭曰水經渭水注引此文亦不作地理志疑後人傳寫脫去應劭曰三字因與下沂音先歷反九字顏注誤并爲一右扶風鄠下古國續漢志鄠古扈國說文鄠字注云右扶風縣扈字注云夏后同姓所封戰於甘者在鄠非謂鄠卽國也當依尙書正義所引作古扈國其義方合鄠

下又有滃水師古曰滃音決水經渭水注作沈水亦謂
是水爲滃水沈當作沆與滃聲相近錢氏本改作滃水
非也美陽下周太王所邑毛詩周南正義引作周文王
所居說文邠字注云周文王所封在右扶風美陽中水
鄉此作太王後人所改武功下垂山古文以爲敦物錢
氏本改作岳山案郊祀志岳山師古曰據地理志武功
但有垂山無岳山也顏本實作垂字史記夏本紀索隱
引華山古文以爲敦物又云太華卽敦物華岳可以通
稱垂山疑華山之譌河東郡左邑下莽曰兆亭水經涑
水注司馬彪曰洮水出聞喜縣故王莽以縣爲洮亭也

兆當作洮四字又當在聞喜下垣說文沆字注云水出河東東垣王屋山史記夏本紀集解引鄭注云沆水出河東東垣縣王屋山周禮職方氏注云滎兗水也出東垣入于河釋云出東垣者地理志文也今本垣上脫東字東郡畔觀史記平準書河決觀徐廣曰觀縣名也屬東郡溝洫志云又爲石隄使西北抵黎陽觀下師古曰觀縣名也翟方進傳義與東郡都尉斬觀合文潁曰觀縣名也續漢志云衛公國本觀故國此畔字是後人所加南燕錢氏云春秋正義引此無南字郡國志亦無南字衍也案宋書州郡志云前漢曰南燕後漢曰燕六朝

本已然曹參傳云程處反於燕灌嬰傳云擊破柘公王
武軍於燕西師古曰燕亦縣名古南燕國也皆無南字
潁川郡父城左氏僖廿四年傳杜預注云應國在襄城
城父縣西昭十九年傳注云城父今襄城城父縣說文
云激水出南陽魯陽入城父史記留侯世家伍子胥列
傳王翦列傳索隱俱引作城父元和郡縣志云城父故
城在郟城縣東南四十里故殷時應國也後人因沛郡
有城父嫌與同名乙作父城後漢書光武紀馮異傳續
漢志水經澠水注汝水注俱作父城當是後人從今本
所改汝南郡鮦陽下孟康曰鮦音紂明監本作音紂紅

反左氏襄四年釋文云鯛孟康音紂後漢書吳祐傳陰
興傳李賢注俱云鯛音紂高帝紀師古曰地名爲射自
相假借亦猶鯛陽音紂蓮勺音酌當時所呼別有意義
足證顏本止作音紂無紅反二字南陽郡堵陽下莽曰
陽城水經清水注作赭陽引地理志曰縣有赭水王莽
曰陽城也今本堵當作赭又脫有赭水三字常山郡元
氏下沮水首受中丘西山窮泉谷東至堂陽入黃河說
文云泚水在常山山海經郭璞注云今泚水出中丘縣
西窮泉谷東注于堂陽縣入于漳水文選注引漢書恒
山郡元氏縣有泚水首受中丘西山窮泉谷入黃河今

本作沮水誤也會稽郡山陰下會稽山在南上有禹冢
禹井史記夏本紀集解引作山上有禹井禹祠周禮職
方氏疏引作山上有禹井續漢志作禹冢禹井卽禹冢
也後人多聞冢寡聞井因改禹井作禹冢後并禹祠二
字刪之作禹冢禹井非也越嶠郡姑復下臨池澤在南
續漢志姑復注引地道記鹽池澤在南青蛉下臨池澤
在北續漢志注引華陽國志曰有鹽官濮水出臨皆鹽
字之譌牂柯郡夜郎下豚水後漢書夜郎傳有女子浣
于邈水李賢注引前志作邈水豚卽邈字之省句町下
又有盧唯水三國志諸葛亮傳五月渡瀘裴松之注引

作瀘惟水然則盧當作瀘古字通用也代郡标氏下孟
康曰标音權氏音精說文云标犬怒也从犬示聲代郡
有标氏縣又讀若銀權精二字本标字反切傳寫者誤
分爲二其音遂不可曉遼東郡番汗下沛水出塞外西
南入海汲古閣本依宋本下有應劭曰汗水出塞外西
南入海十二字注引應劭曰者是釋番汗命縣之義師
古曰沛音普葢反汗音寒汗字作音在沛字下顏本當
有此十二字明監本刪之汪文盛歐陽鐸兩本又以應
邵曰三字補在沛水上皆非是交趾郡龍編水經葉榆
水注云又東逕龍淵縣故城南建安二十三年立州之

始蛟龍蟠編于南北二津故改龍淵以龍編爲名據此
建安以前當名龍淵非龍編也師古曰編音鞭疑因避
唐諱而改膠東國下密下有三台山明監本作三石山
水經濰水注引作三戶山郊祀志祠三戶山於下密魏
書地形志長廣郡卽墨有三戶山三台三石皆三戶之
譌嘉慶甲子十月八日

漢志水道考證序

夫天下之至變者莫如水或千百年而變或數十年而變或一二年而變觀其趨決无常遷徙不定載籍所陳靡得而盡也然其中名號雖殊源流本一學者加以考證則古今不變之經改易之跡猶可如指掌焉自古言水道者山海經荒邈難稽外此最詳者莫如禹貢其次則有漢書地理志嗣後水經有作酈氏有注加以應劭闕駟杜預郭璞之徒參稽引證厥名猶詳至宋元以後世競新名舊蹟漸廢而班氏之所記始微故以漢志上考禹貢諸水禹貢河入海在碣石志則改從章武禹貢

江入海在中江志則改從北江禹貢嶓冢導漾東流爲漢志則有西漢東漢之分禹貢導黑水至于三危志則僅記黑水祠于滇池而不詳其所出蓋以志上距禹貢已歷二千餘年其所言乖異宜無怪其然也水經撰于和順以後去志未遠淇水至黎陽入河而止水經則自內黃以下盡目淇流沮水與沔水互通水經卽以東狼谷爲沔水所出汝水出定陵水經謂在梁縣沛水至乘氏爲泗水水經則通名之曰濟它如易湖漢爲贛水改鬱水爲溫水河東則詳澮涑九江則出肥施枝分派別不可悉舉降而下之則又無論矣班氏身爲蘭臺合史

得見天下圖籍故其所記約而能該詳而有法東京大
儒如許君撰說文解字鄭君注尚書周禮所以引地說多
與志同則其書之精審不苟取重後世有自來已頤煊
劉覽有年因取班氏所記可名者三百六十一無名者
一百三十一隨其所入條分縷繫又復錯舉古書證其
同異別爲四卷首記北方諸水次記東南諸水次記西
南諸水末仿水經之例記以池澤所在俾學者窮源竟
委觸目可知用以推當時之古道息衆論之紛爭則區
區之述亦未必無補于來哲云爾嘉慶甲子十二月八
日書于藁城官舍

吳王濞封會稽三郡考

漢書高帝紀云六年春以故東陽郡鄣郡吳郡五十三縣立劉賈爲荆王十二年十月詔曰吳古之建國日者荆王兼有其地今死無後朕欲復立吳王長沙王臣等請立沛侯爲吳王吳王濞傳云荆王劉賈爲黥布所殺上患吳會稽輕悍無壯王填之乃立濞爲吳王王三郡五十三城師古謂吳王濞所封三郡卽荆王劉賈三郡然以吳王濞本傳考之有吳有會稽有豫章而無東陽與鄣是時東陽已廢楚漢初年會稽郡治吳故國別有吳郡疑治在廣陵故灌嬰傳云下東城歷陽度江破吳

郡長吳下得吳守遂定吳會稽豫章郡既有會稽復有
吳郡劉賈爲荆王會稽與吳并爲一故東陽鄣吳爲三
郡潁爲吳王吳與會稽分爲二後又得豫章并鄣爲四
郡故伍被傳云吳王王四郡之衆地方數千里五行志
云吳王封有四郡五十餘城潁本傳言王三郡者據其
始封而言也徐廣曰荆王劉賈都吳吳王移廣陵故潁
傳云及削吳會稽豫章書至吳王悉其士卒孝景前三
年正月甲子初起兵於廣陵廣陵卽吳郡治其時潁未
削者尙有吳鄣二郡及吳王敗後廣陵改爲江都地理
志廣陵國下注云高帝六年屬荆十一年更屬吳景帝

四年更名江都廣陵縣注云江都易王非廣陵厲王胥
皆都此并得鄆郡而不得吳當時廣陵國治江都而不
治廣陵廣陵爲吳鄆共界地明二王得鄆地而不得吳
地也漚本傳云吳有豫章郡銅山韋昭曰此有豫字誤
也但當言章郡如昭所言則豫章郡不在封中吳王所
得止吳鄆會稽三郡與漚本傳及伍被傳五行志四郡
之言不合其說非也

禹都陽城續考

頤煊旣作禹都陽城考或據皇甫謐謂禹始都陽城後乃遷于晉陽其說非也史記封禪書昔三代之君皆在河洛之間故嵩高爲中嶽而四嶽各如其方國語云昔伊洛竭而夏亡河竭而商亡韋昭曰禹都陽城伊洛爲近漢書音義臣瓚曰吳起對魏武侯曰昔夏桀之居左河濟右太華伊闕在其南羊腸在其北河南城爲值之又周書度邑篇曰武王問太公曰吾將因有夏之居南望過于三塗北望瞻于有河有夏之居卽河南是也是終夏代之君未嘗居河北也漢書地理志太原郡晉陽

云故詩唐國不言禹都所在左氏傳引夏書曰惟彼陶唐有此冀方今失其道乃滅而亡案穀梁傳云鄭同姓之國也在乎冀州淮南子云正中冀州曰中土又云少室太室在冀州少室卽嵩山在潁川郡密高與陽城相近是則夏書所云冀方卽指陽城而言後人誤以爲禹貢冀州故皇甫謐云禹受舜禪都平陽或于安邑或于晉陽皆懸揣其詞而不能定其實禹都在河南不在河北馬班之說不可易也漢志於陽城下不言禹都陽翟云夏禹國國都本可通稱或傳寫之譌故應邵卽注云夏禹都也續漢志亦云陽翟禹所都陽城在嵩山之南

今河南登封縣陽翟今在開封府禹州其地相距止七十餘里漢志陽城下不言者明其地今在陽翟也禮記緇衣惟尹躬先見于西邑夏鄭君注夏之邑在臺西孔冲遠正義曰世本及汲冢古文並云禹都陽城正在臺西臺今偃師縣與陽翟相近陽翟本潁川郡治史記貨殖列傳云潁川南陽夏人之居也夏人政尙忠朴猶有先王之遺風漢志云潁川南陽本夏禹之國夏人上忠其俗鄙朴是禹都陽城漢魏人並無異說至皇甫謐而始疑之括地志云禹居洛州陽城者避商均時非久居也水經潁水注云陽翟夏禹始封於此爲夏國徐廣曰

夏居河南初在陽城後居陽翟皆不免望文生義其說
寧足信乎

宅記

余家在台州府城大營巷乃宋朝壯指揮營故址見嘉定赤城志宋城內五營壯指揮居其一與州營巷相連故又稱大營俗譌爲康熙十三年討耿逆屯兵之所非也

府城著姓甚寡余家自高王父遷居于此前臨大營巷後抵寶城巷左隣東門城根直街右隣嘉爵橋直街方圍之內聚族而居皆由大門出入 國初時馮洪何葉稱四大姓今馮葉所居已鞠爲茂草何亦僅數人存唯余家科名未替故數台州之著姓必以余家爲最

自大門而入分東西邊東邊同曾祖伯叔兄弟所居西
邊同高祖伯叔兄弟所居東西邊風氣各異凡得科第
者俱住東邊

大門題扁曰司農大夫高王父官戶部時所署大門內
轉東石臺門而入有橫街街北大門內爲敬業堂四明
仇滄柱兆鼇所書大廳七間廳之左爲一嘯軒念劬伯
父所居庭前有石壇種牡丹一本旁有紅茶花諸伯叔
少時皆讀書于此廳之右爲靜光樓孟昭伯兄所建中
有白茶花廳進有正樓七間又進小樓五間爲四拙齋
懋謙伯父所居花石楚楚頗見結構庭前素心蘭數盆

奇香撲鼻辛亥夏伯父從粵西官舍攜歸者齋之右爲
櫟園園之南有最樂軒

橫街之東有檜樹老榦青葱曾王父所手植家大人嘗
詠檜樹詩云離奇詰屈飽霜雪與汝共見雍正年想見
其古檜樹之旁有園舊有芭蕉大冬青樹蒲桃蔓其上
夏月過之忘暑乾隆甲辰秋爲大風所拔

由檜樹折而北有長街中有小樓三間余家惟此樓最
古相傳高王父遷居大營已先有此樓今爲達泉伯弟
所居

山檜樹轉東而北有長甬道卽余家保艾堂舊址堂大

樓七間前爲大廳廳之旁有左右廂左廂外有大槐樹
右廂外有海棠一株廳舊爲曾王父宴客之所乾隆丙
子燬于火

甬道北大門內爲傳經堂余家所居也大樓七間兩旁
樓各三間左樓後有小天井有水榭花一株右樓外廂
屋三間爲半曉居家大人居其中窗外有大園雜蒔菜
甲瓜菓有老桑數株每當秋深蕭瑟之聲可聽傳經堂
後爲鄂不館嘉慶丁巳春阮雲臺閣學視學至台榭以
贈余與櫛堂者青浦王少寇昶作記錢唐徐西澗弑朱
謂卿王繪爲圖一時交游俱有題詩稍東爲綠杉居有

大杉庇蔭其間亦百餘年物園中巖石家大人少時從王恒叔白鷗莊移歸白鷗莊在東門外山宮爲宋待制東巖堂舊址亦足見此石之古矣

甬道折而東有小臺門內書樓三間爲虛受齋曾王父所居處也庭前有小假山方竹數叢紅木樨二株皆曾王父手植齋後有紅茶花二株又舊有牡丹雀李薔薇玫瑰余猶及見之舊稱爲後花園後爲琴山伯父所居園之外有倉樓十餘間樓側有梧桐栢樹數株

大門內轉西石臺門而入亦有橫街街北大門內爲高王父所居正堂故址相傳堂後有花園極大康熙年間

燬于火其詳不可得聞矣今僅橫樓五間樓之北有小軒彤章叔父所居樓之南有書齋五間頗清曠熊中伯兄所居庭前植菊花數百本每至九月花開時諸昆季晨夕往還觴詠其間亦一時之樂也

橫街直進又有小石門由小石門直進大門內大廳七間爲分繡堂宋時余家文惠公适通判台州嘗建分繡閣於漆差通判廳有記見嘉定赤城志因取以名堂楹爲蕭山毛西河奇齡所書字法奇古與余所藏西河真蹟絕相類堂之右有書樓三間晰庭叔父所居又北有小廳五間廳前有羅漢松一株皆曾王伯父劬存公舊

居

小石門稍折而北有大門內大廳五間瑞五伯父舊居
廳之後有大樓七間配祇伯兄所居

鈞軒文鈔卷六

臨海

忌日不祭議荅淵如夫子

禮記王制曰喪三年不祭唯祭天地社
事曾子問曰大夫之祭鼎俎既陳籩豆既設不得成禮
廢者幾孔子曰三年之喪齊衰大功皆廢外喪自齊衰
以下行也士之所以異者總不祭所祭於死者無服則
祭儀禮喪服傳曰有死于宮中者則爲之三月不舉祭
蓋古者吉凶不相干吉凶相遇喪爲重祭爲輕孔冲遠
曰凡禮卒哭而耐練而禘于廟此爲新死者爲之非常

祭也其常祭必待三年喪畢春秋之時未至三年而爲吉祭者皆非禮也會子問曰天子崩未殯五祀之祭不行既殯而祭自啟至于反哭五祀之祭不行已葬而祭云既殯已葬而祭者明前此祭不行者竟不設祭也又曰當七廟五廟無虛主虛主者唯天子崩諸侯薨明不祭故廟可虛主今許太恭人在殯金恭人爲婦揆以律文服在斬衰非禮所謂外喪也廿七日爲金恭人忌日俗有設祭之禮太先生主喪固無與義孫齊衰以下禮亦當停奔喪曰凡喪父在父爲主雜記曰父有服官中子不與於樂祖父母同官至尊之喪非世父母叔父母

異門苟尊可比或俟期年服除再申私薦亦祖不厭孫
姑不厭婦之義也其餘時祭可仿權制卒哭而後行事
旣無永闕之傷亦合禮經之正龕陳所見不知審否伏
望裁定嘉慶乙丑六月廿五日

期喪在任行禮議荅淵如夫子

禮記王制喪三年不祭唯祭天地社稷爲越紼而行事
鄭君注越紼行事不敢以卑廢尊孔冲遠云私喪者是
其卑天地社稷是其尊今雖遭私喪旣殯以後若有天
地社稷之祭卽行之故曾子問曰君薨五祀之祭不行
旣殯而祭之自啟殯至于反哭五祀之祭不行旣葬而
祭之蓋古人居喪唯不自祭其家廟其餘外神皆不廢
祀今功令期功以下之服不去官則凡主祭外神及祭
謁上官皆得改用吉服者明上官尊不敢以卑者之私
喪廢禮也然古禮吉服雖易其弁經與帶仍得依用喪

制服問曰凡見人無免經雖朝于君無免經唯公門有稅齊衰檀弓亦曰士唯公門說齊衰可見古人居喪至公門唯脫齊衰未嘗去經經重于帶經且不除帶更可知則凡不得已改用吉服並不與無服同也王制齊衰之喪三月不從政而雜記云期之喪卒哭而從政者雜記士三月而葬是月也卒哭大夫三月而葬五月而卒哭是王制據士而言雜記據大夫而言故其月數有不同也喪大記君既葬王政入於國既卒哭而服王事大夫士既葬公政入於家既卒哭弁經帶金革之事無辟也周制世官無後世遷除調署之制故卒哭後卽當從

政明以國事爲重也今七七已滿許太恭人靈櫬遠歸就葬雖未屆古人五月之期但帷堂已徹卽與卒哭無異一切安葬禮儀聽至家鄉陳設其在任叅謁上官接見寮屬

大清會典旣無明文傳曰君子不奪人之喪亦不可奪喪今依禮經酌時制凡叅謁上官弁絰旣非所施吉袍之上可繫帛帶外穿補服加以素珠接見寮屬吉袍之上繫以帛帶可穿元色素掛不用補服素珠其祭大神如叅謁上官之儀祭小祀如接見寮屬之儀終事仍易喪服似亦於今古無悖也伏賜裁察爲幸嘉慶乙丑七

月十二日

漢置五經博士考

漢書百官公卿表博士秦官掌通古今秩比六百石員多至數十人武帝建元五年初置五經博士宣帝黃龍元年稍增員十二人武帝紀亦云建元五年置五經博士其前無聞唯後漢書翟酺傳云孝文皇帝始置五經博士趙歧孟子題辭云孝文皇帝欲廣遊學之路論語孝經孟子爾雅皆置博士後罷傳記博士獨立五經而已儒林傳贊云武帝立五經博士初書唯有歐陽禮后易楊春秋公羊僅舉四經而不及詩以詩孝文時已立韓嬰傳孝文時爲博士轅固傳孝景時爲博士楚元王

傳聞申公爲詩最精以爲博士三家之立皆在武帝建
元前故傳贊中不復出也傳贊又云孝宣世復立大小
夏侯尙書大小戴禮施孟梁丘易穀梁春秋至元帝世
復立京氏易平帝時又立左氏春秋毛詩逸禮古文尙
書宣帝紀云甘露三年廼立梁丘易大小夏侯尙書穀
梁春秋博士不言施孟劉歆傳云往者博士書有歐陽
春秋公羊易則施孟孝宣皇帝猶廣立穀梁春秋梁丘
易大小夏侯尙書又無大小戴其言皆與傳贊異案施
讎傳梁丘賀爲少府詔拜讎爲博士百官表梁丘賀以
宣帝神爵三年爲少府孟卿傳小戴以博士論石渠其

立皆當在甘露前紀傳不書者畧也宣帝立博士八兼武帝四故百官表云宣帝稍增員十二人詩齊魯韓三家不在數中後易省楊何故藝文志云漢興迄于宣元有施孟梁丘京氏列于學官而不及楊左氏春秋毛詩逸禮古文尙書初立即廢故藝文志皆云未列于學官退附於所立諸家之後後漢書光武中興立五經博士各以家法教授易有施孟梁丘京氏尙書歐陽大小夏侯詩齊魯韓禮大小戴春秋嚴顏凡十四博士禮省后蒼春秋省穀梁又分公羊爲二其餘皆西京之制也

孟喜京房易皆古文辨

漢世治章句者爲今學治訓故者爲古學漢書孟喜傳喜從田王孫受易丁寬傳寬至雒陽從周王孫受古義作易說三萬言訓故舉大義而已寬授同郡碭田王孫田王孫授施雠孟喜梁丘賀喜所治本古文易故許君說文解字序易稱孟氏爲古文也秦燔書易以下筮獨存故傳古文者皆言災異孟喜傳喜從田王孫受易喜好自稱譽得易家候陰陽災變書詐言師田生且死時枕喜膝獨傳喜諸儒以此耀之京房傳受易梁人焦延壽等云嘗從孟喜問易會喜死房以爲延壽易卽孟

氏學高相傳治易與費公同時其學亦亡章句專說陰陽災異自言出于丁將軍丁將軍者卽寬也故鄭君傳費氏易其注易有爻辰值爻之法又復兼通圖緯竝爲之注蓋易古文之學本如是當時章句之學利祿所在治之者衆古文奧義難通又不立於學官治之者終漢世不過數人故孟喜京房所傳易世皆極力詆之孟喜稱得田生易同門梁丘賀疏通證明之曰田生絕於施讎手中時喜歸東海安得此事京房稱延壽易卽孟氏學翟牧白生不肯皆曰非也劉向亦以焦延壽獨得隱士之說託之孟氏不與相同班孟堅並載之傳中蓋皆

爲章句之學所眩矣嘉慶乙丑十月五日

鄒平伏生墓辨

漢伏生墓在今鄒平縣東北十八里自水經注以迄唐
宋元明皆無異說近人撰伏徵君墓考謂漢鄒平故城
在今治西北四十里之孫家鎮鎮西有寄駕塚卽伏生
墓其說非是案水經注云漯水東北逕東朝陽故城南

宋書州郡志前漢曰
朝陽後漢曰東朝陽

又東逕漢徵君伏生墓南又東逕

鄒平縣故城北太平寰宇記云臨濟縣

後漢郡國志樂
安國臨濟縣本

狄安帝更名史記正義云故城在高苑縣西北
二里寰宇記臨濟縣齊州東北一百二十里

朝陽城

漢縣名也今縣東四十里

後漢書耿弇傳李賢注云朝
陽城在今濟州臨濟縣東

伏生冢在縣朝陽故城東五里學者欲明伏墓必先知

朝陽鄒平兩故城所在方可定其道里案于欽齊乘云

朝陽城漢初封華寄爲侯國高齊廢入章邱寰宇記章邱縣齊州

西北一百二十里隋復置改曰臨濟元和郡縣志臨濟縣開皇

六年改爲臨濟縣餘已見上宋咸平四年復省入章邱宋史地理志

臨濟以其地爲臨濟鎮古城在鎮東據此則臨濟故城

當在今章邱縣東北伏墓去臨濟四十五里今章邱縣

里則臨濟故城當在今朝陽故城又在臨濟故城東四

十里也太平寰宇記云鄒平本漢舊縣晉永嘉之亂其

縣遂廢後魏屬臨濟縣魏書地形志東平原郡臨濟縣有鄒平城高齊天保

七年自今長山縣界濟南故城寰宇記長山縣濟南故城古郡城在今縣西北

移平原縣於今理東南三十五里漢梁鄒故城

山東通志梁鄒

故城在今鄒平地屬焉隋開皇三年自梁鄒城移平原

縣入鄒平城今理是也

寰宇記鄒平縣淄州西北一百二十里

十八年改

平原縣爲鄒平縣宋史地理志云淄州鄒平縣景德元

年移治濟陽廢縣

寰宇記高苑縣淄州北百一十里廢濟陽縣唐景龍元年析高苑置在州

北九十四里元和郡縣志濟陽縣本漢梁鄒縣也卽今鄒平縣治

據此則今鄒平縣治

非漢之鄒平縣漢鄒平故城當在今鄒平縣東

山東通志鄒平

故地在今鄒平縣東北境故水經注叙伏墓在朝陽之東鄒平之西

其跡甚明今鄒平縣東北之伏墓卽太平寰宇記所稱

朝陽故城東之伏墓特以縣治有遷改各附相近言之

故所稱地名有不同耳若以今鄒平縣西北四十里之

孫家鎮當鄒平故城以鎮西之寄駕塚當伏墓

前人俱無明文

臆定不可爲據

則伏墓在朝陽城之西其差舛不可通矣近人

又謂今伏墓在小清河南是在濟水南非漯水北與水

經注不合其說亦誤漢書地理志濟水自滎陽至琅槐

入海

琅槐在今樂安縣東北一百里

漯水自東武陽東北至千乘入海

千乘在今高苑縣東北二十五里

據水經注濟水自東北逕華不注山

又東逕營縣故城南又東北逕高昌縣故城南又東北

逕樂安縣故城南又東北至甲下邑南東歷琅槐縣故

城北入海漯水自東逕鄒平縣故城北又東逕東鄒城

北又東北逕建信縣故城北又東北逕千乘縣二城間
又東北亂河枝流而入于海漯水在鄒平故城北濟水
在鄒平故城南元和郡縣志云鄒平縣濟水南去縣三
十五里太平寰宇記云鄒平縣濟水西自臨濟縣界流
入南去縣三十五里又北入高苑縣界今鄒平縣治爲
宋初廢濟陽縣寰宇記云以在濟水之北故名縣此皆
唐宋時濟水在鄒平縣南之確證今從小清河宋元後
之改流反疑伏墓在濟水南豈非誤乎余懼後人以僞
亂真不辨伏墓所在因作此以正之

黃帝龍首經序

龍首經之名始見於晉葛洪抱朴子遐覽篇隋書經籍志五行類有黃帝龍首經二卷顏氏家訓雜藝篇云吾嘗學六壬式亦值世間好匠聚得龍首金匱玉鈴玉燮玉歷十許種書則此書之傳世久矣尋書中所占諸術第十法云功曹廷掾爲土官外部吏及內不屬五曹者皆屬功曹第四十九法占諸吏謀對計簿當見上官又云欲見王者以天乙諸侯以太常將軍以勾陳卿相二千石以青龍令長以朱雀皆漢時官制其第九法占知臣吏心善惡漢書翼奉傳所述日辰爲客加時爲主人

辰正時邪則客正主人邪辰邪時正則客邪主人正漢人本有此占法此書在漢時爲民間日用之書故至六朝猶行於世唐宋以後傳寫始微晁氏郡齋讀書志陳氏書錄解題皆未及見此本上下二卷占法七十二章孫淵如觀察從道藏中錄出頤煊見而愛之影鈔此冊并爲校勘一過據蕭吉五行大義第四篇引龍首經子齊青州丑吳越揚州一條宋許洞虎鈴經戰位篇引龍首經將欲出兵初以木日聞事一條諸欲陳兵必伺向白虎一條占兵已交勝負篇引龍首經先起爲客後起爲主一條今本皆無此文疑傳寫尙有殘闕又午爲勝

先今世流俗書本皆作勝光據五行大義第二十篇云
午勝先者陽氣大威陰氣時動惟陽在先爲勝也足正
俗本光字之譌他時倘得付諸剞劂流通于世以視靈
棊九宮諸術其得失勝負不知又當何如也嘉慶十年
太歲乙丑月將在午日辰丙申加時在西臨海洪頤煊
書于德州節署之平津館

牟子序

隋書經籍志牟子二卷後漢太尉牟融撰新舊唐志同
梁僧祐宏明集有漢牟融理惑論三十七篇前有自序
云一名牟子理惑劉孝標世說新語注李善文選注太
平御覽諸書引牟子數條雖字句異同皆在理惑論三
十七篇中知隋唐志所載牟子卽是書也後漢書牟融
傳融代趙熹爲太尉建初四年薨是書自序云靈帝崩
後天下擾亂則相距已百餘年牟子非融作明矣宏明
集題下注云一云蒼梧太守牟子博傳子博之名不見
于史據自序云先是牟子將母避世交阯年三十六歸

蒼梧娶妻太守聞其守學謁請署吏不就是牟子本蒼
梧人未嘗爲蒼梧太守自序又云是時州郡相疑隔塞
不通太守以其博學多識使致敬荊州會被州牧優文
處士辟之復稱疾不起又云牧弟爲豫章太守爲笮融
所殺時牧遣騎都尉劉彥將兵赴之遂不果行久之退
念以辨達之故輒見使命方世擾攘非顯已之秋疑牟
子避亂交州未嘗居官宏明集作蒼梧太守牟子博豈
從其後而署之耶抑別有其人耶是書雖崇信佛道尙
不悖於聖賢之旨故隋志列于儒家吾師淵如觀察愛
其爲漢魏舊帙錄出別行屬頤煊考校其事因識其始

末於卷首仍題曰漢太尉牟融撰者因隋唐之舊亦疑以傳疑之意云爾

書鄭志後

隋書經籍志鄭志十一卷魏侍中鄭小同撰鄭記六卷
鄭玄弟子撰後漢書玄本傳門生相與撰玄荅諸弟子
問五經依論語作鄭志八篇而無鄭記其言與隋志異
鄭記崇文總目已不著錄鄭志今世所傳尙有三卷此
本爲偃師武虛谷億所校復撰補遺一卷其中有誤采
者臨碩卽臨孝存鄭君荅臨孝存周禮難據本傳本別
爲書孔融傳融爲北海相薦舉賢良鄭玄彭璆邴原等
郡人甄子然臨孝存知名早卒融恨不及見之是臨爲
鄭君同輩未必在弟子之列孝經正義鄭君卒後其弟

子追論師所著述及應對時人謂之鄭志鄭之弟子分證門徒各述所言更爲問荅編錄其語謂之鄭記今書中有鄭君荅弟子語亦有弟子自相荅問當屬鄭記之文劉昭續漢志補注引鄭志有小泰山據漢書郊祀志是鄭氏注非鄭志也鄭君弟子河內趙商見後漢書本傳太平御覽引鄭之自序趙商字子聲河內溫人博學有秀才能講難而吃不能劇談又引抱朴子趙子聲書詣鄭康成學曰夫學之於人猶土地之山川也珍寶於是乎出猶樹木之有枝葉木根於是乎庇也又引鄭玄別傳故尚書左丞同縣張逸年十三爲縣小史君謂之

曰爾有贊道之質玉雖美須雕琢而成器能爲書生以
成爾志不對曰願之乃遂拔於其輩妻以弟女劉德北
海人注漢書見顏師古叙例田瓊魏博士見杜氏通典
其餘如劉炎昺模孫皓冷剛任厥汜閣陳鏗陳鑠崇精
崇勦鮑遺王權桓勦焦喬王瓚皆無可攷證而後漢書
本傳門人山陽郗慮東萊王基清河崔琰樂安國淵任
嘏以及馬昭孫炎之徒又皆不在鄭志中則知其弟子
之不及著錄者多矣

子路死衛孔悝之難論

子路死衛孔悝之難史記左氏傳俱載其事或疑子路之死爲孔悝其死爲傷勇者非也史記云方孔悝作亂子路在外聞之而馳往遇子羔出衛城門謂子路曰出公去矣而門已閉子可還矣母空受其禍子路之聞而馳往者爲出公非爲孔悝也子路曰食其食者不避其難食其食者謂食出公之祿古者邑宰皆受祿於公家非大夫之私屬也故城門開子路隨而入造蕢贖蕢贖與孔悝登臺子路曰君焉用孔悝請得而殺之是時孔悝爲蕢贖所劫其徒襲攻出公君臣之分已絕子路直

以亂賊視之故必得而甘心焉左氏傳云太子焉用孔
悝雖殺之必或繼之言雖殺出公必有繼而起者非謂
已必繼孔悝而爲難也出公據國拒父其罪固不容誅
若以君臣之義而論子路唯知有出公而已子羔曰弗
及不踐其難邑宰位卑政弗及已其義固可不死子路
曰求利焉而逃其難由不然利其祿必救其患此則子
路之素志也故子羔之不死非貪生子路之死非傷勇
鹽鐵論殊路篇子路仕衛孔悝作亂不能救君出亡身
殖於衛尤足證子路之死爲出公非爲孔悝宋人以子
路之死爲傷勇者毋乃非實錄與嘉慶丙寅三月二十

六目

先府君行狀

府君姓洪氏諱杵字世持號平木晚年號雪蘊台之臨海縣人洪氏南宋時自鄱陽分支居縣西鄉下塘園至國朝始遷居府城大營巷高祖諱若臯順治戊子舉人乙未進士歷官戶部湖廣司郎中擢授福建福寧道按察使僉事曾祖諱熙揆廩貢生鎮海縣學訓導事蹟俱見省縣志祖諱承濂郡庠生以府君官

贈修職郎祖妣周太孺人早歿繼配鄭太孺人生子二女一長伯父諱柝廩貢生歷署樂清臨安縣學教諭次卽府君府君甫二齡先王父棄世鄭太孺人熒熒發居

府君幼多病時家方鼎盛伯叔中或有欺以孤寡者鄭太孺人青燈獨夜對府君而泣府君亦泣府君性穎悟既長善屬文乾隆壬申補弟子員每試輒冠軍鄭太孺人曰台州僻處海濱見聞有限吾聞天台齊息園宗伯海內大儒也主講杭州敷文書院汝兄弟盍往師之府君遂偕伯父從宗伯游前後凡七年宗伯嘗題府君採芝招鶴圖云予主講松岡諸生來請益者率以舉業次則以古文詞能以古聖賢爲己之學者惟生一人而已乙酉府君以選拔貢成均出武進錢文敏公維城之門丙戌入都

朝考取二等第七名引

見以教職用戊子選授新昌縣學訓導新昌與台接壤
板輿迎養庚寅二月初八日鄭太孺人六袞壽辰有司
先以節孝請

旌奉

旨給帑建坊部文適以前一日至又恭遇

萬壽覃恩封典門下士稱觴者三百餘人咸以爲榮府
君天性孝友旣之官悉以舊宅推讓伯父族中兄弟有
以匱乏來告者無不周給每歲命諸姪至署讀書從兄
復熿甲午舉於鄉官廣西平南縣知縣鼎熿丁酉以選

板貢成均官龍泉縣學教諭最後從弟

蒙煊

戊申副榜

官廣東廣寧縣知縣皆府君所造就也府君講析名理詞旨不窮凡有求以詩古文者操筆立就自晨至暮賓客門弟子闐滿新昌文廟就圯府君率俸修之衙齋廢壞詳請建造以及諸生月課朔望鄉約無不具舉學使王文端公杰方伯徐公恕中丞李公質穎先後爭欲舉薦府君皆以母老辭庚子春

高宗純皇帝南巡浙江府君奉委率領廢員迎

鑾奉

旨賞緞二疋府君卽以是年秋舉於鄉癸卯正月丁鄭

太孺人憂乙巳服闋署安吉縣學教諭戊申冬補授嘉善縣學教諭嘉善故劇邑每歲完漕糧時衿士與縣官持短長有四旗八總之謠府君至專以文藝課士凡諸生以訟訴者必爲之反復勸釋或有受屈抑者再三上請得解乃已在嘉善五年人咸懷府君之賢先是

不孝

坤熿

姿質過人能爲詩古文府君鍾愛甚丁未居先妣

鄭孺人憂今大興朱相國前視學至台訪得之已酉以選拔貢成均壬子舉北闈發榜十餘日暴歿於京邸府君哭之慟自此意緒不寧又值上官某涖任鴟張甚府君愈不樂遂於是冬棄官歸府君自少去家鄉中諸老

徂謝府君向不諳家人生產以及世俗鄙瑣時又值宵
小交乘家難累作而府君處之怡如也暇則爲山水之
游酌酒賦詩流連竟日閉有來問字者亦復從容應之
丁巳阮雲臺閣學視學至台 不孝頤熿震熿 以治經受

知庚申閣學以少司農撫浙建詒經精舍 不孝頤熿震

熿來往武林與海內通儒學士捧手定交府君嘗謂 不

孝等曰夫文詞者枝葉德行者本根未有本根不實而

枝葉能茂者也母以小善忘大業亦母以虛聲隳實行

汝兄弟其勉之府君性好吟詠嘗與茹古香庶子邵瑤

圃戴東山太史曹仲梅倪韭山廣文倡和然不欲以詩

自鳴新昌蘇明府解餉回任邑中父老有綵帳之迎府君題語云三春花雨重携鶴百里笙歌早入雲袁簡齋先生見之大相擊節錄入隨園詩話不知其爲府君作也尤嗜書畫鑒賞無豪髮差家中藏書皆府君節俸所得或典衣買之晚年兼好形家言所著有雪蘊詩鈔六卷藏于家府君以乙丑閏六月初六日寅時終于正寢距生於雍正甲寅九月十四日寅時享年七十有二配先妣鄭孺人貴州貴陽營叅將諱有得公女沈靜寡言事節姑以孝聞乾隆丁未正月初六日辰時棄世詳見不孝坤爐
哀誌子六人長不孝師爐
國學生嘉慶辛酉

二月初五日歿娶朱氏次

不孝坤煊

乾隆己酉拔貢壬

子順天舉人壬子九月廿二日歿娶沈氏次

不孝頤煊

嘉慶辛酉拔貢娶葉氏次

不孝革煊

候選從九品娶傅

氏次

不孝震煊

台州府學優廩生娶沈氏繼娶陳氏次

不孝坎煊

臨海縣學增生娶趙氏女二人長適國學生

金鼎元

次適邑庠生許

瑛孫十三人長

瞻圻

臨海縣學

增生娶黃氏次

瞻垣

娶李氏

瞻壇瞻堦

俱不孝師煊

生

不孝坤煊

無子以

瞻壇

承嗣

瞻墉

聘朱氏

不孝頤煊

生

瞻臺瞻陞

俱

不孝革煊

生

瞻堪瞻玷瞻塾瞻遺

俱不孝

震煊

生瞻壁瞻堦

俱不孝坎煊

生孫女十二人長適謝

如安

次適朱

復占

次適高

鳳歧

俱

不孝師

煊
生次字邑

庠生何

映潢不孝坤

煊
生次字傅

玉瑞不孝革

煊
生餘

一不孝師煊

生一

不孝坤煊

生一

不孝頤煊

生二

不孝

革煊

生一

不孝震煊

生一

不孝坎煊

生俱未字曾孫二

人用錫廣錫

俱

瞻垣

生嘉慶丙寅正月初四日未時奉

府君合葬先妣鄭孺人於臨海縣西鄉二十五里金竹

山之原

不孝頤煊

謹狀